

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj 7/10), Vlada Zeničko-dobojskog kantona, na prijedlog Ministarstva zdravstva, na 70. sjednici, održanoj dana 12.07.2012. godine, d o n o s i

## **ZAKLJUČAK**

### **I.**

Utvrđuje se Prijedlog Odluke o preuzimanju prava i obaveza osnivača i usklađivanju organizacije i poslovanja Javne ustanove Kantonalna bolnica.

### **II.**

Prijedlog Odluke iz tačke I. ovog zaključka upućuje se u dalju skupštinsku proceduru.

### **III.**

Zaključak stupa na snagu danom donošenja.

Broj: 02-\_\_\_\_\_/12.  
Datum, 12.07.2012. godine  
Zenica

**PREMIJER**

*mr.sci. Fikret Plevljak, dipl.ing.*

DOSTAVLJENO:

1x Skupština Zeničko-dobojskog kantona,

1x Ministarstvo zdravstva,

1x a/a.

## PRIJEDLOG

Na osnovu člana 6. Zakona o ustanovama („Službeni list R.BiH“, broj: 6/92, 8/93 i 13/94), člana 53. stav 4. i člana 234. Zakona o zdravstvenoj zaštiti („Službene novine F.BiH“, broj 46/10), Skupština Zeničko-dobojskog kantona, na \_\_\_\_ sjednici održanoj \_\_\_\_\_2012. godine, donosi

### **O D L U K U**

#### **o preuzimanju prava i obaveza osnivača i usklađivanju organizacije i poslovanja Javne ustanove Kantonalna bolnica**

#### **I OPĆE ODREDBE**

##### **Član 1.**

##### **(Predmet)**

Ovom odlukom Skupština Zeničko-dobojskog kantona (u daljem tekstu: Osnivač), preuzima prava i obaveze osnivača Javne ustanove Kantonalna bolnica, osnovane Zakonom o Javnoj ustanovi Kantonalna bolnica („Službene novine Zeničko-dobojskog kantona“, broj: 11/97 i 2/98) i vrši usklađivanje organizacije rada i poslovanja Javne ustanove Kantonalna bolnica sa Zakonom o zdravstvenoj zaštiti („Službene novine F.BiH“, broj: 46/10).

#### **II NAZIV I SJEDIŠTE**

##### **Član 2.**

##### **(Naziv i sjedište)**

Javna ustanova Kantonalna bolnica nastavlja sa radom i poslovanjem pod promjenjenim nazivom koji glasi: „Javna ustanova Kantonalna bolnica Zenica“ (u daljem tekstu: Bolnica).

Skraćeni naziv Bolnice je: „Kantonalna bolnica Zenica“.

Sjedište Bolnice je u Zenici, ulica Crkvice 36.

##### **Član 3.**

##### **(Pravni status)**

Bolnica ima svojstvo pravnog lica i upisana je u sudski registar nadležnog Suda u Zenici.

##### **Član 4.**

##### **(Djelatnost)**

Bolnica obavlja poslove utvrđene Odlukom o klasifikaciji djelatnosti Bosne i Hercegovine („Službeni glasnik BiH“, broj: 47/10), koji obuhvata područja:

- a) 86.10 - djelatnost bolnica,
- b) 38.11 – skupljanje neopasnog otpada,
- c) 38.12 – skupljanje opasnog otpada,
- d) 38.21 – obrada i zbrinjavanje neopasnog otpada,
- e) 38.22 – obrada i zbrinjavanje opasnog otpada.

U okviru djelatnosti iz stava 1. ovog člana Bolnica obavlja djelatnost dijagnostike, liječenja, medicinske rehabilitacije i zdravstvene njege bolesnika, te osigurava boravak i prehranu bolesnika.

Bolnica obavlja i druge poslove utvrđene Statutom u skladu sa Zakonom o zdravstvenoj zaštiti.

#### **Član 5.**

##### **(Ovlaštenja u pravnom prometu)**

Bolnica u pravnom prometu sa trećim licima istupa kao jedinstveni pravni subjekt u svoje ime i za svoj račun, bez ograničenja u okviru svoje djelatnosti.

#### **Član 6.**

##### **(Statusne promjene)**

Bolnica može proširiti ili promijeniti djelatnost i vršiti statusne promjene: spajanja, pripajanja, podjele i izdvajanja.

Odluku iz stava 1. ovog člana donosi osnivač.

### **III IZVOR I NAČIN OBEZBJEĐIVANJA SREDSTAVA ZA RAD I NAČIN RASPOLAGANJA VIŠKOM PRIHODA NAD RASHODIMA**

#### **Član 7.**

##### **(Sticanje sredstva za rad)**

Sredstva za rad Bolnica ostvaruje:

- ugovorom sa Zavodom zdravstvenog osiguranja kantona,
- ugovorom sa ministarstvom zdravstva,
- ugovorom sa fakultetima i drugim visokim školama zdravstvenog usmjerenja,
- ugovorom po osnovu proširenog i dobrovoljnog zdravstvenog osiguranja iz sredstava osnivača u skladu sa zakonom,
- iz budžeta federacije, kantona, odnosno općine,
- iz učešća korisnika zdravstvene zaštite u pokriću dijela ili ukupnih troškova zdravstvene zaštite,
- slobodnom prodajom usluga na tržištu,
- iz drugih izvora na način i pod uslovima određenim zakonom, aktom o osnivanju i statutom Bolnice.

#### **Član 8.**

##### **(Raspodaganje prihoda i rashodima)**

Višak prihoda nad rashodima Bolnica koristi za obnavljanje i razvoj djelatnosti.

### **IV MEĐUSOBNA PRAVA I OBAVEZE IZMEĐU OSNIVAČA I USTANOVA**

#### **Član 9.**

##### **(Odgovornost za obaveze)**

Za svoje obaveze Bolnica odgovara sredstvima sa kojima raspolaže.

Osnivač ne odgovara za obaveze Bolnice.

#### **Član 10.**

##### **(Saglasnost osnivača)**

Statut i pravilnik o unutrašnjoj organizaciji i sistematizaciji Bolnice podliježe obaveznoj saglasnosti osnivača.

Saglasnost na akte iz stava 1. ovog člana u ime osnivača daje Vlada kantona.

## V UPRAVLJANJE I RUKOVOĐENJE

### **Član 11.** **(Upravljanje)**

Organ upravljanja Bolnicom je upravni odbor.

Upravni odbor ima predsjednika i četiri (4) člana i čine ga predstavnici:

- osnivača – tri (3) člana, od kojih jedan (1) mora biti ispred kantonalnog ministarstva,
- stručnih radnika Bolnice - dva (2) člana, od kojih jedan (1) mora biti iz reda zdravstvenih radnika.

Predsjednika i članove upravnog odbora imenuje i razrješava Vlada kantona, na prijedlog kantonalnog ministra, po postupku i na način utvrđen Zakonom o ministarskim, vladinim i drugim imenovanjima („Službene novine F.BiH“, broj: 12/03 i 34/03).

Mandat upravnog odbora traje četiri godine.

### **Član 12.** **(Djelokrug rada)**

Upravni odbor Bolnice obavlja sljedeće poslove:

- donosi statut Bolnice,
- imenuje i razrješava direktora, odnosno vršioca dužnosti direktora,
- utvrđuje godišnji program rada,
- donosi finansijski plan i usvaja godišnji obračun,
- donosi opšta akta o unutrašnjem uređenju i sistematizaciji poslova i drugih opštih akata, saglasno zakonu i statutu,
- odlučuje o svim pitanjima obavljanja djelatnosti radi koje je Bolnica osnovana, ako zakonom nije određeno da o određenim pitanjima odlučuje drugi organi Bolnice,
- usmjerava, kontroliše i ocijenjuje rad direktora,
- rješava sva pitanja odnosa s osnivačem,
- odlučuje o korištenju sredstava preko iznosa utvrđenog statutom Bolnice,
- odgovara osnivaču za rezultate rada i poslovanja,
- podnosi osnivaču najmanje jedanput godišnje izvještaj o poslovanju,
- obavlja i druge poslove saglasno zakonu i statutu Bolnice.

### **Član 13.** **(Rukovođenje)**

Organ rukovođenja Bolnicom je direktor.

Direktora Bolnice imenuje i razrješava upravni odbor na osnovu javnog konkursa, uz prethodnu saglasnost kantonalnog ministra.

Direktor organizuje i rukovodi radom Bolnice, zastupa i predstavlja Bolnicu prema trećim licima i odgovoran je za stručni rad i zakonitost rada. Direktor obavlja i druge poslove utvrđene zakonom i statutom Bolnice.

Direktor podnosi upravnom odboru jednom tromjesečno izvještaj o cjelokupnom poslovanju Bolnice.

Direktor učestvuje u radu upravnog odbora bez prava odlučivanja.

Mandat direktora traje četiri godine.

#### **Član 14. (Statut)**

Osnovni opći akt Bolnice je statut.

Statutom Bolnice se uređuje:

- naziv i sjedište osnivača,
- naziv, sjedište i djelatnost Bolnice,
- izvori i način sticanja sredstava za rad,
- način raspolaganja viškom prihoda nad rashodima i način na koji se pokriva višak rashoda nad приходima,
- prava i obaveze osnivača u pogledu obavljanja djelatnosti zbog koje se zdravstvena ustanova osniva,
- međusobna prava i obaveze Bolnice i osnivača,
- stručna tijela Bolnice, mandat članova stručnih tijela, način izvora i finansiranja,
- imenovanje organa upravljanja i rukovođenja,
- rok za donošenje statuta, imenovanje direktora i organa upravljanja,
- druga pitanja od značaja za rad Bolnice.

Statut Bolnice podliježe obaveznoj saglasnosti osnivača.

Bolnica donosi i druge opće akte u skladu sa zakonom, kolektivnim ugovorom i statutom Bolnice.

#### **Član 15. (Stručna tijela i komisije)**

Stručna tijela i komisije Bolnice su:

- stručno vijeće,
- etički komitet,
- komisija za lijekove,
- komisija za poboljšanje kvaliteta i sigurnosti u zdravstvu,
- komisija za prigovore pacijenata.

Bliže odredbe o postupku imenovanja, sastavu, nadležnostima i načinu rada i odlučivanja stručnih tijela i komisija iz stava 1. ovog člana uređuju se statutom Bolnice.

### **VI PRELAZNE I ZAVRŠNE ODREDBE**

#### **Član 16. (Imenovanje upravnog odbora i direktora)**

Vlada kantona će u roku od 15 (petnaest) dana od dana stupanja na snagu ove odluke, privremeno na period utvrđen zakonom, imenovati upravni odbor i vršioca dužnosti direktora.

#### **Član 17. (Upis u sudski registar)**

Vršilac dužnosti direktora Bolnice dužan je preduzeti sve potrebne radnje za upis u sudski registar promjena utvrđenih ovom odlukom.

#### **Član 18. (Donošenje statuta)**

Upravni odbor Bolnice će u roku od 30 (trideset) dana od dana imenovanja donijeti statut Bolnice, a u roku od 60 (šezdeset) dana i druge opće akte iz svoje nadležnosti.

**Član 19.**  
**(Status imovine)**

Bolnica zadržava pravo korištenja državne imovine koju je koristio na dan stupanja na snagu ove odluke.

**Član 20.**  
**(Objavljivanje i stupanje na snagu)**

Ova Odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: \_\_\_\_\_/12.  
Zenica, \_\_\_\_\_ godine.

PREDSJEDAVAJUĆI

---

# **O b r a z l o ž e n j e**

## **I. PRAVNI OSNOV**

Pravni osnov za donošenje Odluke o preuzimanju prava i obaveza osnivača i usklađivanju organizacije i poslovanja Javne ustanove Kantonalna bolnica Zenica sadržan je u odredbama Zakona o ustanovama („Službeni list R.BiH“, broj: 6/92, 8/93 i 13/94), koji propisuje sadržaj osnivačkog akta (odluke o osnivanju) i člana 53. stav 4. Zakona o zdravstvenoj zaštiti („Službene novine F.BiH“, broj: 46/10), kojim je utvrđeno da kanton, pored ostalog, može biti osnivač Bolnice.

## **II. RAZLOZI ZA DONOŠENJE**

Zakonom o zdravstvenoj zaštiti u članu 234. stav 1. utvrđena je obaveza osnivača da u roku od 24 mjeseca od dana stupanja Zakona na snagu preuzmu osnivačka prava nad zdravstvenim ustanovama čiji su osnivači, odnosno usklade svoja osnivačka akta sa odredbama ovog Zakona.

Budući da ovaj rok ističe 10.08.2012. godine, neophodno je pristupiti donošenju nove odluke o osnivanju Javne ustanove Kantonalna bolnica Zenica, na osnovu koje će ova zdravstvena ustanova izvršiti usaglašavanje svojih opštih akata sa ovom Odlukom, kao i odredbama novog Zakona o zdravstvenoj zaštiti, te provesti odgovarajući postupak radi upisa promjena u Odluci o osnivanju Bolnice.

## **III. OBRAZLOŽENJE PREDLOŽENIH PRAVNIH RJEŠENJA**

U članu 1. ove odluke utvrđeno je da Skupština Zeničko-dobojskog kantona preuzima prava i obaveze osnivača Javne ustanove Kantonalna bolnica Zenica saglasno članu 234. Zakona o zdravstvenoj zaštiti, te da se odlukom vrši usklađivanje rada i poslovanja Bolnice sa Zakonom o zdravstvenoj zaštiti i drugim propisima iz ove oblasti.

Članom 2. utvrđeno je da Bolnica nastavlja sa radom i obavljanjem zakonom utvrđene djelatnosti pod promjenjenim nazivom koji glasi: Javna ustanova Kantonalna bolnica Zenica i utvrđeno sjedište ove zdravstvene ustanove, kao i njen skraćeni naziv.

Članom 3. propisano je da je Bolnica upisana u registar kod nadležnog suda.

U članu 4. djelatnosti Bolnice usklađena je sa Odlukom o klasifikaciji djelatnosti Bosne i Hercegovine („Službeni glasnik BiH“, broj 47/10) i čl. 97. i 100. Zakona o zdravstvenoj zaštiti kojim je utvrđen djelokrug rada Bolnice.

Članovima 5. i 6. utvrđena su ovlaštenja u pravnom prometu i statusne promjene koje mogu biti: spajanja, pripajanja, podjele i izdvajanja Bolnice.

U članu 7. utvrđen je način sticanja sredstava za rad Bolnice koji je usklađen sa odredbama člana 62. Zakona o zdravstvenoj zaštiti.

U članu 8. propisan je način raspolaganja viškom prihoda nad rashodima.

Članom 9. utvrđena je odgovornost Bolnice za stvorene obaveze.

U članu 10. propisano je da statut i pravilnik o unutrašnjoj organizaciji podliježu saglasnosti osnivača koju u ime Skupštine daje Vlada kantona.

Radi se o novoj odredbi koja utvrđuje da umjesto Skupštine saglasnost na statut Bolnice daje Vlada. Pored toga novinu predstavlja i obaveza Bolnice da na pravilnik o unutrašnjoj organizaciji traži saglasnosti osnivača, čime se uspostavljaju mehanizmi kontrole novog zapošljavanja u javnim zdravstvenim ustanovama u situacijama kada to i nije neophodno.

U članu 11. propisan je sastav upravnog odbora Bolnice, čime je sastav ovog organa usaglašen sa odredbama člana 64. stav 4. Zakona o zdravstvenoj zaštiti koji propisuje da upravni odbor, umjesto tri ima dva člana predstavnika osnivača, umjesto jednog, dva člana predstavnika Bolnice, od kojih jedan član mora biti iz reda zdravstvenih radnika Bolnice, dok je odredba o jednom članu ispred kantonalnog ministarstva ostala nepromijenjena.

U članu 12. propisan je djelokrug rada upravnog odbora Bolnice usaglašen sa odredbama Zakona o zdravstvenoj zaštiti.

Članovima 13. propisan je način rukovođenja Bolnicom, imenovanje i razrješenje direktora i njegova prava, obaveze i odgovornosti.

U članu 14. utvrđeno je da je statut osnovni opći akt Bolnice, te da se pored statuta u Bolnici donose i drugi opći akti u skladu sa statutom i drugim propisima.

U članu 15. propisana su stručna tijela i komisije Bolnice predviđene Zakonom o zdravstvenoj zaštiti i Zakonom o pravima, obavezama i odgovornostima pacijenata („Službene novine F BiH“, broj: 40/10).

U članu 16. utvrđena je obaveza i rokovi u kojima će se imenovati upravni odbor i vršilac dužnosti direktora Bolnice, privremeno, na period utvrđen zakonom.

Članom 17. utvrđena je obaveza direktora da izvrši sve potrebne radnje za upis promjena iz ove odluke u sudski registar.

U članu 18. utvrđeni su rokovi za donošenje statuta i drugih općih akata iz nadležnosti Bolnice.

Član 19. reguliše status državne imovine koju koristi Bolnica, na način kako je to propisano u članu 223. Zakona o zdravstvenoj zaštiti.

U članu 20. utvrđen je prestanak važenja dosadašnjeg Zakona o osnivanju Bolnice.

Član 21. propisuje vrijeme stupanja na snagu odluke.

#### **IV. FINANSIJSKA SREDSTVA**

Za sprovođenje ove Odluke nisu potrebna dodatna finansijska sredstva.

MINISTARSTVO ZDRAVSTVA